



Tir Yimyim

www.tiryimyim.in

e-mail : tiryimyim@gmail.com

Regd. No. RNI. NAGAAO/2004/13113. Postal-NE/RN-717.

TAPAK 3 Yangia anidakangma : [Tir Yimyim](#) [tir_yimyim](#)

tir yimyim TAPAK 7

Küm 5 tsüngda ni tenangzükba 3
meinyaktet: Arvind Kejriwal

South Korea tir Yoon Suk-yeol mapa
nungi anentsütsü lemtet

VOL. XXII ISSUE NO. 66 (ADOK 66) DIMAPUR AMUNGNÜ (SUNDAY)

LUCHII (DECEMBER) 15, 2024

₹ 5.00

NFHRCC-i Contractor Firms dang metedaktsür

PM Modi-i Emergency atema Congress aitsü

Dimapur, December 14, 2024 osang sangoktsü.

(TYO): December 12, 2024 nü 2 Lane Foothills Road Construction Project senden nung medentetba Contractor Firms-i December 17, 2024 nü Implementation Agreement forms meshia sign asütsü NFHRCC-i mepishia metedaktsüogo.

Iba anogo anepdang 11:00 ako nung Contractor Firms den Divisional Executive Engineers ajaki NFHRCC base office, Kher Mahal, Dimapur nung forms meshia sign asütsü metedaktsü.

December 14, 2024 nü NPWD, (R&B) Minister den Kohima nung ajurutepa senden amenba sülen NFHRCC-i iba

Aluyimertemi Delhi-i aoba athir; aika yiru

New Delhi, December 14, 2024

(Agencies): Delhi-i aotsü atema apusoba lungkak aitba aluyimertemi Honibarnü Haryana-Punjab arrtsü anasa sentong athitsüsa tensa ka ajurua liasü.

Haryana security personnel-i tenük amdkatsüba tangola amshidang aluyimer aika yiruba sülen iba lemtet agi.

"Forum anatio onok jatha anena atatsü lemtetogo" ta Punjab aluyimer lennir Sarwan Singh Pandher-i ashı.

Haryana security personnel-i mapa inykdang aluyimer 17-18 shi yiru. Police-i rubber bullets

Nagaland nung alirtemi asen state sasep nung connectivity road system ka alitsü atema Foothills Road project ya mapang shitak nung renemtsü atema senden nung jembitepa liasü.

Chief Minister Nephii Rio, NPWD, Road & Bridges Minister Kaito Aye aser bangdak NPWD, Road & Bridges ketcangsürtemi 2023-24 financial year nungi SASCI (Special Assistance to States for Capital Investment) Program kubok Rs. 148.5 Crores meshizükba atema kanga pelar aser tenüngsang agütsür ta NFHRCC ketcangpurtemi ashı.



December 14, 2024 nü Prime Minister Narendra Modi-i Lok Sabha nung Constitution küm 75 abensaba indang onük jembidang agiba noksa angur.

New Delhi, December 14, 2024

(Agencies): 1975 nung Emergency benokba atema Prime Minister Narendra Modi-i Congress aitsü.

"Constitution küm 25 ajungba mapang shisa endok, 1975 nung Emergency benok, constitution temeten ajak agien aser linük ya tepuokdak ka kümduktsü" ta Honibarnü PM Modi-i ashı.

Constitution yanglur küm 75 ajungba atema anogo ananü o atsütepa jembiba mapang PM Modi-i Lok Sabha nung iba olen jembı.

"Linük nung senso ajak ket nungi temeten agien aser media noktang. Congress-i iba ya kodanga magientettsü" ta pai ashı.

"Congress nung kibong kati Constitution nung kongshia arur. Congress kibong kati teti

tangatetba tai, mapa tai aser policy tai nung arur" ta Modi-i Gandhi'er kibong aika jembı.

"1949 nung India-i Constitution agizükba sülen jenjang tajungba kuma arur. Alemlı nungi India-i democratic inyakyim nung tera yanga aliba ajanga alima ajungmesor. India nung democracy aser tesüiba nung republican ka ama azükaraa aruogo. Iba ajanga tangar ajungmesor aser tanü India dang Mother of Democracy ta ajar" ta PM Modi-i ashı.

"Constitution renemertemi India nung inyaksangshi, sobaliba aser senmang dak tamang aka. India ya 1947 küm kümktet aser 1950 nung India nung democracy tenzük ta parnoki mamang. Parnoki sobaliba aser inyaksangshi nung amang aser linük küm meyirjang aika lia aruba

meteta liasü" ta pai ashı.

Constitution ajnaga tetsür nem voting rights agütsü aser tanü tetsürtemi anir linük renloker, ta Modi-isa ashı.

"Constituent Assembly-i linük nung sorkar kati Uniform Civil Code (UCC) mapa tenzüknüa liasü aser BR Ambedkar-i tamangba yimsü ajak asoshi UCC aitsü atema inyak" ta pai ashı.

"Constituent Assembly-i UCC atema mapang talangka jembia liasü aser tatem nung parnoki sorkar kati lemtet agir linük nung UCC mapa tenzük nung junger ta telemtetba agi" ta Modi-isa ashı.

"Supreme Court-ia aiben UCC ya linük nung bener arutsü shiogo. Constitution aser Constitution yanglurtemi tangatetba ama onoki Secular Civil Code ka renemdar" ta pai ashı.

Y Patton-i Dimapur Riphyim Ekhung Community Hall lapoktsü

Dimapur, December 14, 2024

(TYO): December 14, 2024 nü Deputy Chief Minister Y. Patton-i Eralibill Dimapur nung Dimapur Riphyim Ekhung indang Community Hall lapoktsüogo.

Y Patton-i tesentepertem dang pei pei alidak aser loktiliba nung yimjung aser temeim prokshirtem asütsü ayongzük.

Paisa mapang timi amshitsü aser telongjem nung tejakleni aotsü ayongzükba den sobaliba subotsütem wazuka ayontsü nenshia ashı.

Dimapur aser Chumoukédima District nung aliba Lotha nunger asoshi pai Lotha Tokhu Emong 2025 ayongzüka amongtsü ta Patton-isa metedaktsü.

Dimapur Riphyim Ekhung Chairman aser Project Director DRDA Wokha Thungbemo Patton-i mapa tajung inyakba aser Dimapur Riphyim community hall nung yaritepa atema deputy chief minister-isa pelaba ashı.

"Dimapur Riphyim Ekhung-i Lotha nunger asoshi mapa tajung

inyaka arur. Asenoki asen sobaliba aser inyaksangshi wazuka ayutsüla" ta Dimapur Lotha Hoho Chairman, Thungchanthung Murry-ia ashı.

Eralibill village chairman-ia Deputy CM Y. Patton dang Eralibill village tashi kilometer 1 gari lenmang yangluba den tanga terenlok mapa aika bentsür aruba asoshi pelaba metedaktsü.

Eralibill nung aliba Lotha nungeri teti village council den yaritepa aruba atema chairman-isa pelaba metedaktsü.

Mission Poshan 2.0: Nagaland nem Rs. 622.01 agütsü

Dimapur, December 14, 2024

(TYO): Tesüiba küm 3 tsüngda Mission Poshan 2.0 kubok Centre-i Nagaland nem Rs. 622.01 crore agütsüogo.

Nagaland MP S Supongmeren Jamiraser Bihar nungi MP Raja Ram Singh nati Lok Sabha nung unstarred question asuba langzüdang Minister of State for Women and Child Development, Savitri Thakur-i iba

osang metedaktsü.

Küm asem tsüngda Uttar Pradesh-i sen teimtiba (Rs. 7798.11 crore) angu aser iba sülen Assam-i Rs. 5204.84 crore angu ta ministry ajanga ashı.

MP Supongmeren aser Raja nati arishi küm 0 nungi 5 tashi state telesma malnutrition indicators meshia liasü ta Communications Department,

NPCC-i sangdong ka nung ashı.

Taküm October ita atema Poshan Tracker data nung ashiba agi Nagaland nung 28% stunted, 6.6% underweight children lir ta minister Savitri Thakur-i langzü.

Maharashtra nung stunted children (0-5) teimtiba 47.7% lir aser Madhya Pradesh nung underweight children (26.5%) teimtiba lir ta laisa ashı.



Ongpangkong Mungdang-i ayongzüka 'Ongpangkong Zünket Naklu' ta sur Ongpangkong tzükongsanger Union Public Service Commission (UPSC) nung takok ngutetertem nem tetushi agütsüba sentong ka 14th Dec, 2024 nü Aongza Ki, Mokokchung town nung akaba mapang Zükertem, OM ketdangsür aser OM Zünket Naklu ludentem külema tangokba noksa nung angur. Zünket Naklu agizükertem; Alemtshai Jamir IAS, 1977 (Longsa), C. Lima Imchen IPS, 1977 (Longkhum), asür L. Supongwati Longkumer IRS, 1981 (Küpza), asür P. Tiatemsü Pongener IRS, 1999 (Ungma), Imkongla Jamir IAS, 2002 (Chungta), Sallong IRS, 2002 (Aliba), Imlimeren Jamir IRS, 2004 (Ungma), Unil Kichu IPS, 2012 (Khensa), Moatenla IRS, 2012 (Mangmetong), Aotula T. Imchen IPS, 2014 (Mangmetong), Imsennaro Walling IFS, 2022 (Khensa) aser Imsürenla Longkumer IA & AS, 2023 (Ungma) par 12 liasü. Par rongnung Alemtshai IAS Rtd, C. Lima Imchen IPS Rtd aser Aotula T. Imchen IPS par asem dang tentet. Iba sentong nung tajunshir Dr. P. Kilemsünglai onük tajung aika bener arua tesentepertem ayongzüka liasü. Mokokchung, 14th December, 2024.

State nung Lok Adalat takok ngua agiogo



Kohima, Luchii/December 14 (TYO): Nagaland State Legal Services Authority (NSLSA) tawabangba kubok linük ajunga den külemi Nagaland nunga tanü district balala nung bench 11 amenoka 4th Quarterly National Lok Adalat agiogo.

Ajak senteper ken o 456 benokba nungi ken o 354 bentettsüogo aser settlement amount ajak agi sen 5,46,87,912 liasü.

Ken o benokbatem rongnung Bank recovery ken o, motor accident claims aser tanga ken o tem densema liasü.

Lok Adalat ya Executive Chairman, Nagaland State Legal Services Authority & Judge, Gauhati High Court, Justice Manash Ranjan Pathak, Member Secretary, NSLSA Neiko Akami, NJS tawabangba kubok agi aser District & Sessions Judges, Chief Judicial Magistrate, Judicial Magistrate (First Class) Presiding Officers liasü.

Mokokchung nung National Lok Adalat ya Principal District & Sessions Judge cum Chairperson, Mokokchung DLSA Victo Sema lenisüba nung agi aser Chief Judicial Magistrate cum Secretary Mokokchung DLSA Julian Sitlhou aser Retainer Lawyer Watitemjen aser Panel Lawyer Mokokchung DLSA nunger

conciliators liasü. Ajak senteper bank recovery ken o 18 aser criminal Compoundable offence ken o 1 benoka liasü. Ajak senteper bank ken o 19 bentettsüogo aser settlement amount 37,79,725.04 liasü.

Dimapur nung Principal District & Sessions Judge cum Chairman Dimapur DLSA N Longshithung Ezung presiding officer liasü. Ajak senteper pre litigation cases 120 aser pending trial cases 7 benok aser ken o 85 bentettsüogo. Settlement amount ajak agi 1,80,12,570 liasü.

Wokha DLSA-i ayongzuka District Court Complex Wokha. Nung 4th quarterly National Lok Adalat agiogo. Ajak senteper ken o 13 benok aser bentettsüogo. Total settlement amount sen 10,68467 liasü.

Tuensang nung 4th Quarterly National Lok Adalat ya PD&SJ cum Chairperson Tuensang DLSA Somet Chumden Chang, NJS Antimangyang Chang, Retainer Lawyer aser Herola, Panel Lawyer Tuensang DLSA nunger lenisüba nung agi. Ajak senteper bank recovery ken o 26 benok aser ken o 12 bentettsüogo. Settlement amount sen 29,10,400 liasü.

Zunheboto nung 4th Quarterly National Lok Adalat ya District Court Complex Zunheboto nung agi aser ajak senteper ken o 7 benok aser 6

bentetja liasü. settlement amount ajak agi 15,35,797 liasü.

Kohima nunga National Lok Adalat ya District Court Kohima nung agi. Chief Judicial Magistrate and Secretary Kohima DLSA, Wokono Yhoshü, NJS Presiding Officer liasü aser Panel Lawyers 8 aser PLVs 4-i teyari agütsü. Ajak senteper ken o 26 benoka aser 23 bentettsüogo. Settlement amount sen 2,886,010 liasü.

Phek nunga Pre-Litigation bank recovery cases 20 benoka bentettsüogo. Settlement amount ajaka agi sen 20,57,113 liasü.

Maneni Mon nung pre-litigation bank recovery ken o 5 benok aser 4 bentettsüogo. Settlement amount sen 11,07293 liasü. Peren nunga ken o 7 benoka bentettsüogo. settlement amount ajak agi sen 8,81,500 liasü.

Longleng nung Bank recovery ken o 9 benok aser ken o teku prongla bentettsüogo. Settlement amount ajak agi 13,88,824 liasü. Kiphire DLSA-i ayongzuka Pungro jila nung mobile Lok Adalat ayongzuka CJM cum Secretary Kiphire DLSA Holika Sukhalu, NJS lenisüba nung agiogo. Ajak senteper Bank Loan Recovery ken o 58 benok aser ken o 41 bentetja liasü. Settlement amount ajak agi sen 53,88,037 liasü.

Nagaland CM-i asükhulemsatep

Dimapur, Luchii/December 14 (TYO): Nagaland Chief Minister Neiphiu Rio-i sangdong ka ajanga, Kohima Law College Assistant Professor aser Advocate Kezhokhoto Savi December 13 nü Bethel Hospital, Kohima nung astüba osang angazüka temulung koremba lemsatepogo.

Savi ya ochishir, bendanga agütsüba aser kanga meranga inyakba tesayur ka aser social activist ka liasü. Nagaland Voluntary Consumer Organisation tir ama pai nüburtem nem tangazükba agütsü aser nüburtem ajangzükdaktsü atema ken o aika benokogo. Pa ya lokti ajungketsü atema inyakba maparen nung kanga jangrabangra inyakba nisung ka liasü. Paisa nüngdaka aliba nüburtem nem teyari agüja

aruogo. Maneni Savi ya lanurtem aika atema nükrangdong ka liasü.

Pa asüba ya Naga nunger aser talisa Angami nunger atema takoksa tulu lir. Pa asüba ajanga tawa adokdaktsüba ya süngdaktsü atema tasak asütsü aser pa kanga menungratsü. Ajisüaka asenoki pa taküm asoshi Tsüngrem nem tenüngsang agütsüti aser pa mapa tajung maneni bilemteta aotsü sarasademja atar.

Mangyim jashi tia nung aliba mapang ni aser ozü kibongi asür kinungertem den asükhulemsateper aser tulusang Tsüngremi parnok nem tasü tait tanüla aser anisüngzük agüjang ta sarasademtsüba den asür tanüla teti tatem makdak anisüngzükdakjang ta sarasademtsür, ta kasa sangdong ajanga metedaktsü.

Opang Jamir-i Khristmas ken tasen ka sayaogo

Dimapur, Luchii/December 14 (TYO): Küm asem tejakdang Khristmas ken "Pelatepang" sayaba sülen Opang Jamir-i ano Khristmas ken tasen ka sayaogo.

Opang Jamir ya Nagaland band 'Avancer' indang frontman lir aser pai December 14 nü "Mongpu Tsungtsung Ola" ta ser ken tasen ka pa indang official YouTube channel nung sayaogo aser ken ya Spotify nunga angutsü.

"Mongpu Tsungtsung Ola," ken ajanga Opang Jamir-i, timla, telongjem aser akangjushitepbä indang osang agütsür. Ken ajanga mapang talangka nungi yongya ata aliba anogo ka koba ajanga tesendaktep raksar aliba yanglushir iba anogo aruba indang jembir.

Jamir-isa, holiday season ajanga tepela aser arishi küm mesüra taoba mapang mangatetep alibatem ajanga bendanger aliba longjemdaktsüba indang jembir.

Paisa, Khristmas ya telongjem, temeim aser arok súa liasü.



tajangshiba dak amedaka lir ta ken ajanga nenshia metedaktsü.

Ken indang lyric ya ken tenba telok Hailinator (Vocal) nungi Jongpongtemsu Longkumer-i zülutsü aser Bendangtuba Longkumer-i video nung teyari agüja liasü. Kensü ya Opang Jamir aser VitzZhimo nati inoka liasü. Production, mixing, aser mastering ajak ya VitzZhimo-i súa liasü.

Tsiesema multipurpose-cum-badminton hall semzükogo

Kohima, Luchii/December 14 (TYO): Tsiesema Village Multipurpose-Cum-Badminton Hall December 14 nü Kohima district kubok Tsiesema Local Ground nung semzükogo.

Iba hall ya Local Area Development Programme (LADP) 2023-24 kubok yangluogo aser Special Assistant to Chief Minister of Nagaland Vibeilietuo Kets-i semzükja liasü.

Sentong nung o jembiba mapang Kets-i, Northern Angami-11 Assembly Constituency kubok LADP ajanga kiojen aika sütsüba atema Chief Minister Neiphiu Rio dang kanga pelaba lemsatep.

Kilung nung asayaba asaya balala asayaba dak alia iba hall nung lokti senden, workshop, seminar amala sentong balala

agitetsü aser lokti telongjem asoshi tongtibang centre ka akümtsü ta pai ashi.

Paisa, nüburtem dang sorkari yangluosta iba hall ya kanga junga anepalutsü aser takok tashi tajangzük ka-a amshitsü ayongzuka liasü.

Sentong nung project report agütsüba mapang Kechalhoubi Talie-i, iba hall ya sen lakh 57.20 intoka yangluogo, ta metedaktsü.

Iba sentong ya Mhalelhou Mere lenisüba nung agi aser Tsiesema Baptist Church pastor Keneingulie Mere-i Tsüngrem temaotsü meshizuka sarasadema liasü.

Maneni GB Zapuvi Mere-i lokti pela agizükba o jembiba aser CYE, CRC Tsiesema-i ken tajung tena liasü. Sentong nungsa Tsiesema Village Council chairman Khrielezo Khro-i tepela o jembiba liasü.

Sakraba Youth Organisation küm 50 jungogo

Dimapur, Luchii/December 14 (TYO): Sakraba Youth Organisation tenteter küm 50 ajungba bejungmung December 14 nü Phek District kubok Sakraba jila Local Ground nung mungogo.

Sentong nung Ex. Speaker Nagaland Legislative Assembly, Government of Nagaland Z. Lohe alakteta jaoker liasü aser Vevoi W.D Vadeo aser Dr. Kuzonyi D Vadeo, ADC, Chumukedima na mejeta jaoker liasü.

Ground indang kikümtong tasenba jubilee host, Dr. Kuzonyi D Vadeo, ADC, Chumukedima-i lapoktsü, jubilee souvenir Vevoi W. D Vadeo-i sayatsü aser jubilee nüngshilong alakteta jaoker Ex-Speaker, Nagaland Legislative Assembly Z. Lohe-i lapokja liasü.

Sentong nung o jembiba mapang Z. Lohe-i, shisatsü aser rongsen kija agi nisung ka chichiba takoker ka mekümtet, saka nisung kati kodang Tsüngrem temeim kanga junga angateta iba temim dak

ajemdaker pei taküm lidir idangji pai tarutsü putu atema mapa tajung inyaka toktsütetsü, ta ashi.

Paisa nisung taküm ka nung asüküm aser pei takok dak metaloker aliba ya koda lendong lir iba indang lemsatep, kechiyong iba ajanga nisung ka raksatsütsü akok ta ashi.

Kasa mapang nung Vevoi W. D. Vadeo-i, sentepa aliba lokti dang inyakyimtem ajak tamajunglen nungi dang magitsü ayongzük. Pai ashiba agi, tanü asüng putu nung asenok pei dak dang rangloker alir, ajisüaka lokti ka ama tejakdangi aotsü atemabo lokti dak rangloker inyaktsü nüngdaker.

Paisa, tetsü tebou mapang takar sobaliba lephsia jembiba aser sentepa aliba lokti dang meranga inyakba yimya angazüka benshitsü ayongzük.

Maneni Dr. Kuzonyi D Vadeo-i, alima den tokteptsü atema nendaka bendanga agüja inyaktsü kodang tongtibang iba indang lemsatep. Paisa, mapa inyaknertem atemabo maongka agi anünga mali ta ashi.

Jubilee lapokba sentong ya Kuhusheyi D Vadeo, Convenor Finance Committee lenisüba nung agi aser Pastor Sakraba Baptist Church Kuduhuto D Vadeo-i sarasadema liasü.

Convenor Organising committee Lehu Lohe lenisüba nung formal sentong agi, Niehusa Cukhamu VCC-i lokti pela agizükba o jembiba, Sakraba Youth Organisation tir Nupoyi D Vadeo-i ti o jembiba aser Christ the King Church Sakraba nungi Vezotha Catechist-i tatem sarasadem agia liasü.

Sentong nungsa Thipuzu Youth Organisation-i ken ka aten, Pfitseromi Youth Organisation, aser Rachu Khel, Viswema nati sobaliba ken tena liasü. Iba dak alia Thetsumi, Khulazu Bawe, Zelome, Jakhama, Razeba,

Tsupfume, Upper Khomi, Middle Khomi, Lower Khomi, Porba, Phola aser Gidemi nungi lanurtem aser VCC representatives temi sentong nung shilem agia liasü. Sentong ya benjung chiyong chiyongba sülen tembanga liasü.

Küm 5 tsüngda ni tenangzükba 3 meinyaktet: Arvind Kejriwal

New Delhi, Luchii/December 14 (Agencies): Sangküm February ita nung Delhi nung assembly elections agitsü lia AAP tongti lenir aser taoba mapang Delhi Chief Minister, Arvind Kejriwal-i, tesüiba küm pongu tsüngda pai aniba sorkari tenangzükba asem meinyaktet, ta ashi.

Agenda Aaj Tak den jembidang Kejriwal-i, 2020 küm election mapang nung pai nangzükba asem dang meinyaktet; tenangzükba asem Yamuna ayong merüktetsü, kibong shia nem pipe ajanga tzü temerük agütsütsü aser Delhi nung gari lenmangtem European standards nung yanglutsü tenangzükbatem lir, ta metedaktsü.

"Ni item tenangzükba asem ya meinyaktet. Talisa ibaji kuli ana ajanga liasü-ka Coronavirus wara aser kaji ni densema AAP lenirtem jail nung puokba agi lir," ta pao ashi.

"Mezungbuba nung küm ana

ser tesadang Covid-19 wara liasü. Iba sülen tiyazü ken otem nung ajemdaker ka khen, la khen ta ozü züngsemtem jail nung puok," ta pao ashi.

"Item ama tayongzükba liaka ozü sorkari item nükjidong atalokstsü atema asalentong renemogo aser nüngdakba senotsü lir," ta pao ashi.

Delhi nung voters dang taruba assembly election nung pa maneni shimang ta mepishia Kejriwal-i, "Kü nem ano khen maongka agüjang, aser taruba küm pongu tsüngda ni item mapa renema inyakstsütsü," ta ashi.

Taoba mapang Delhi Chief Minister-isa, "Tesüiba küm 75 tsüngda sensaker chirnurtemi shisaliok tajung angutsü, ta meimlai liasü mesüra ajaki healthcare service tajung angutsü ta bilema maliasü. Onoki ajak nem khen danga methitemi anogo nung ghonda 24 electricity agütsür. Iba linük nung AAP-i teimla agütsüo," ta ashi.

Kejriwal-i jembiba o aija BJP

lenir Amit Malviya-i, 2015 nungi 2020 küm tsüngda Kejriwal-i Yamuna ayong merüktetsü nangzükba liasü, saka pai ibaji inyakstsü atema ano maneni mapang meshir, ta metedaktsü.

Malviya-i X ajanga, "Kejriwal-i covid wara ajanga küm asem süidaktsü aser ken o balala nung küm ana süidaktsüba ajanga pai nangzükba meinyaktet ta jembir. Ajisüaka wara mapang nung pai par ki asü. Kasa mapang nung BJP-ibo Parliament building tasenba aser Kartavya Path yangluogo. Water minister mapu, süra kechiba tang tashi Delhi nung alirtem nem tzü temerük magütsür?" ta asüngdang.

Ano külen tanga osang ka nung, Hokolbarnü Delhi Chief Minister Atishi-i AAP sorkar scheme kübok yimi nung tetsür ajak nem sen meyirjang kaka agütsütsü atema taruba hopta ka tsüngda registration tenzüksü, ta metedaktsüo.

Congress-i BR Ambedkar nem Bharat Ratna magütsü: Kiren Rijiju



New Delhi, December 14, 2024: Honibarnü Lok Sabha senden nung Parliamentary Affairs & Minority Affairs Minister, Kiren Rijiju-i jembidang tangokba noksa nung angur.

New Delhi, December 14 (Agencies): Honibarnü Lok Sabha senden nung jembidang Parliamentary Affairs & Minority Affairs Minister, Kiren Rijiju-i, Congress party-i BR Ambedkar nem Bharat Ratna award magütsü, ta metedaktsü.

nem tamakok ngudaktsü," ta Rijiju-i ashi.

Paisa, BJP-i pusemba sorkar ka Centre nung tentetba sülen ang linük temzüng yanglusang, Ambedkar nem Bharat Ratna agütsü, ta metedaktsü.

Rijiju-isa Ambedkar-i jembiba o lephshia, küm 20 tsüngda Jawaharlal Nehru-i onük 2,000 dak tali jembio go saka pao khen danga Scheduled Castes nisungtem jenjang ajungsü atemabo mejembi, ta metedaktsü.

Opposition lenirtemi, linük nung minorities temeden jenjang tamajungba akümer, ta jembiba o aija Rijiju-i, Pakistan, Bangladesh aser Afghanistan ama kidanger linüktem nung minorities reshikangshiba ajaki meteta dang lir saka reshikangshi ajangshir aikati India nung jenoker, kechiyong iba linük nungbo parnok kümzüka lir ta parnoki metet, ta ashi.

Hombarnü Lok Sabha nung 'One Nation, One Election' bill benoktsü

New Delhi, Luchii/December 14 (Agencies): December 16, 2024 nü Lok Sabha senden nung Union Law & Justice Minister, Arjun Ram Meghwal-i Constitution (One Hundred and Twenty-Ninth Amendment) Bill, 2024 benoktsü.

Iba bill ya Lok Sabha elections den state assembly elections aser Union Territories asem- Delhi, Jammu & Kashmir aser Puducherry Assemblies election külemi agitsü atema linük temzüng yanglussitsü asoshi lir.

Iba bill ya agizüka ozüng kümra Lok Sabha, state assembly, urban body aser panchayat elections anogo 100 tsüngda agitsü.

Taoba Tir, Ram Nath Kovind-i aniba committee-i benokba onüktem nung ajemdaker One Nation One Election bill renem.

Meghwal-isa Government of Union Territories Act, 1963, Government of National Capital Territory of Delhi Act, 1991 aser Jammu and Kashmir Reorganisation Act, 2019 yanglussitsü atema temeja bill ka benoktsü.

Congress MP, Jairam Ramesh-ibo iba bill ya jungjunga asadangtsü atema Joint Parliamentary Committee (JPC) ka nem agütsütsüla, ta ashi.

Congress dak alia tanga opposition party tem-a aikati iba bill anema nokdaker.

Congress lenir tain, Digvijay Singh-i, iba ya mapa kümä meinyakstettsü, ta ashiba den külemi mid-term mapang nung state sorkar kati tamakok ngura koma asütsü?, ta asüngdang.

"Elections ji ita trok dak tali atsülangtsü makok. Ita trok tsüngda state sorkar ka chirepra tanüngba küm 4 ser tesadang sorkar malitsü asü?" ta Singh-i asüngdang.

Congress MP, Jairam Ramesh-ibo iba bill ya jungjunga asadangtsü atema Joint Parliamentary Committee (JPC) ka nem agütsütsüla, ta ashi.

Congress dak alia tanga opposition party tem-a aikati iba bill anema nokdaker.

Taküm September ita nung Union Cabinet-i One Nation, One Election agizüka liasü aser December 16 nü iba bill Lok Sabha nung benoktsü.

Taoba mapang Tamil Nadu Congress Tir EVKS Elangovan süogo

Chennai, December 14 (Agencies): Taoba mapang Tamil Nadu Congress Tir, EVKS Elangovan Honibarnü Chennai nung aliba nija hospital ka nung süogo; pa arrshi küm 75 liasü.

Erode East constituency nungi MLA, Elangovan ita ka shi tejaken shirang tenziuka liasü aser tepokpok nung timtem adoka November 11 nü hospital-i anir ao. Hopta ana tashi pa ICU nung among,

ajisüaka mekümkükteti Honibarnep 10:12 aken nung asü.

Tamil Nadu Congress Committee Tir, K Selvaperunthagai-i, pa asüba ya state nung Congress party atema takoksa tulu asütsü, ta metedaktsü.

DMK tentetsang, E.V.K. Sampath'er jabaso Elangovan-i 1980s nung yimtenren nung ajemoka Congress party nung aden aser 1984 küm assembly election nung mezüng pao

Gobichettipalayam nungi takok ngua liasü aser 2004 küm MP aküm.

Tamil Nadu nung Congress atema tensa tamajungba mapang nung pa state Congress Tir inyaka liasü. 2016 küm Tamil Nadu nung Congress-DMK teloktep yangluba nung pai tongti shilem agia liasü. Yamaji 2016 küm state assembly election nung pa leniba nung Congress-i menden 48 nung takok angu.



TIR YIMYIM

YIMOBILEM (EDITORIAL)

DIMAPUR AMUNGNÜ, DECEMBER (LUCHII) 15, 2024

Tekümtet asoshi inyakba

Alima nung alir nisung shia atema tanüla tekümtet ya kanga tongtibang lir. Tekümtet tetezü kümzükba. Ajisüaka, tekümtet anguba ya khen atema mesüra kenü langka ka inyaker toktsütsüba ka masü saka tekümtet yabo maneni inyakyonga aotsüba mapa ka lir. Laishibai ashir, "Nenoki atenatena aser tsübua pei tekümtet inyakang." (Filipi 2:8-9). Tetezü, tekümtet ya Tsüngremi asenok nem inyaktsü agütsüba mapa ka lir ta angateter aser ibaji meinyakra tetsübutsü temerenshi angutsü. Atangji, tekümtet anguba ya asenok ajungba agi mesüra asenok dak alangba agi masü saka Tsüngrem taochi ajanga anguba mapa ka lir. Aji oda, Laishibaisa ashir, Tsüngremi asenok kümzükba ya mesüra tekümtet anguba ya asenoki inyakba agi masü saka aji Tsüngrem sempet. (Efesa 2:8). Tetezü asenoksasa asenok kümzüktsü asenok dak tashi mali, saka Tsüngrem taochi agi asenok nem tekümtet ya sempet ka amato agütsü. Aji oda, tekümtet ya Tsüngremer angati sempet lir. Ibai Tesüngmangtsü. Sempet tetezü sen agi aliba masü, asenoki aazükba masü saka angati anguba temoatsü. Ajisüaka, iba sempet ya odang amer kazütsüba sempet ka masü saka sempet denji mapa inyaktsü dena agütsür. Asenok kümzükba mesüra asenok nem tekümtet sempet agütsüba agi Tsüngremi asenok dang akhidang menaba temenen madak dang masü saka ano tarutsü mapang menatsü aliba temenentem madaka takok agütsür. Tetezü, tekümtet sempet ya raraba nok nüang ka mesük, iba yagi temenen den raratsü. Iba jagi ashir, tekümtet ya kenü atema dangbo masü saka alima nungi mepila tashi inyaktsüba mapa ka lir. Kodang asenok nem Tsüngrem tekümtet agütsür, asenokji tangang tasen poktetba taküm ka ama akümer (2 Kor 5:17). Tekümtet mapaji yang nung jagi tenzüker. Aji oda, kodang asenok taküm ya tasen poktetli ama akümer, iba anogo nung jagi Tsüngrem den jaja tenzükdang anogo shia asen taküm tasenba - tasenba yanglulokyonga aotsü Tsüngremi imlar. Kodang asenok nem Tsüngremi tekümtet sempet agütsür, idangji asenok pelar aser iba tepelaji mesamadaktsü tanüla temeshi agi asenok sünga alitsü Tsüngremi imlar. Kodang asenok Tsüngrem nungi tekümtet angur, asen takümji Tsüngrem meyong akümer, anungji asenok taküm ya asen mulungba nung masü saka Tsüngremer mulungba nung aotsü. Laishibai ashir, Tsüngremi asenok nem Pa temulung chia inyaktsüsa mulungtetaktsütsü aser inyakdaktsütsü asoshi asen mulung nung inyaker. Ibai asenok atema teshisadangtsü aser teinyaktsü mapa tuluka lir. Tsüngrem atema inyaktsüabajia Tsüngremi dang asen mulung nung mulungtetaktsür aser inyakdaktsür. Aji oda, Khristan taküm kati angateta inyaktsüba mapa kaji asenoki anogo shia Tsüngremi asenok dak temulung lemtettsüsa kanga kümdanga inyaktsüla. Ajisüaka, ano külen Tsüngremi dang asenok nem Pai mulungba inyaktsü mulungtetaktsür aser inyakdaktsür ta bilema Laishibai ashi ama kechi inyakdir, "kangkokangji mesüra tashishiba kecha medeni inyaktsüla." Filipi 2:14. Itemji Tsüngremi agütsüba tekümtet mapatemji lir. Kodang Tsüngremi asenok taküm nung inyakba metetdir, iba jagi asenok dak tekümtet alibaji ano tali tejangjaba meteta inyaktsü.

OLEMSABANG

NAGA TENEM NUNG REV. DR. E. W. CLARK-i MEZÜNG TENZÜKBA AROGO OTSÜ

- Molungkimong Literature Board

(*Yashi adok nungi...*)

5. "Haimong Church: Feb., 27, 1892. On Feb. 27, there was a meeting with the missionary at Deka Haimong, of the converts who desired baptism ... At this time also a church was formed at Dekha Haimong" (Imchen, Rev. R. Temsü. 'Rev. Dr. Clarki Tenzükba Arogo Otsu'. *Tir Yimyim*. 19-23 November, 2024).

Asenoki American Missionary inyakyim aser zülü-züpong züng-zünga metettsüba ji ya - American Missionary temi kodang arogo 'disband' sur 're-organize' südir parnoki oren itemi benshi - "formed into a church"; "the new Church". American Missionary temi Molungyimsen Arogo August 19, 1894 nung disband asü aser September 23, 1894 nung tenzükshi. Iba indang Missionary record nung yamai shia lir, "September 23, 1894. ... Bendang and Molungba were recognized by the Missionaries as constituting the Molung Baptist Church ... the first regular actions of the new church was to vote to receive into membership ..." (Walling, C. Walu (Compiled). *All is light! All is Light! Source Materials on History of Christianity*. Ao Baptist Arogo Mungdang, Impur, Nagaland. 2001, 33). Iba mesükba, Molungkimong Arogo, February 28, 1892, nung reconstitute asüba yamai Missionary Record nung zulua lir, "On the last Sabbath of February, 1892, three men were baptised at Deka Haimong village. These three, with other church members ... were formed into a church" (*Baptist Missionary Magazine*. 'Mission in Assam'. 1892, 265). Iba kesa tatalokba indang ya Dr. Clark record asem nung aguja aliba angur saka pai-a record asemprongla nung oren balala zulua lir. Anungji, item record ajakdenji, tensa (context) aser molungzung otsü (oral source) kanga junga medemdanga bushitsüla; ajita mesüra otsü züluren (historiography) ji külen tsütsü (one sided perspective) dang asütsü. Tatsü agi, Missionary temi arogo 'disband' sur 're-organize' asüdang, "formed into a church" aser "the new Church" ta zülubaji Arogo asüngashia soshiba ta angateter.

Alima Otsü aser Arogo otsü zuluba approach aser method aika lir. Koba approach benshidir-benshiaka, documents aser texts (oral, written, material source) teperi bushia, tatalokba tarenseñen tejangja kuli den tensa (context) medemdanga zulur. Yamaji 'inter-text' aser 'inter-discipline' repranga, approach ka dang masu 'multiplicity of approaches', asadanga, tajungtiba (plausible) methodology benshia zulur. Naga tenem nung arogo otsü zuludang, tezulur aikati document balala nungi pei akinüba shimtena zuluba aki Arogo otsü tajung nung tarak kettsür aser aji aki nüpür mangmangdaktsür. Ajita süaka, nisung temeyong agi tepilemba balala zuluaka/zulusaka, Naga tenem nung Tsüngrem mapa jijiba atalokba Otsü kodanga memelentsü.

Khristan taküm ka mesük, Molungkimong Arogo tatsük-talem tensa balala ajangshia aruogo aser Tsüngrem taochi nung tanü tashi iba Arogo taküm lir. Naga Tenem Arogo Otsü tongpen nung, Molungkimong Arogo dak alaka tanga arogo shinga 'Mezüng' ta asüba nung awashitsü makoktsü. Molungkimong Arogo Otsü ya Local Church otsü aser Molungkimong sensosanger kipur; iba otsü '(re-)research' agia zulusatsü shinga nem-a tashi agüja mali. 'Molungkimong Arogo: Naga Tenem nung Mezüng Arogo' ta asüba otsü ya, Tsüngrem taochi nung Molungkimong sensosanger-i taküm tenla-a ajangtetba nüngtem aser senmang. Ya Naga tenem nung Arogo Otsü onangnen aser Arogotem Tzüpokdak. Iba Onangnen aser Tzüpokdak ya shibai tateptep otsü aki raksatsütsü aser menentsütsü merangdir, Molungkimong Senso Mungdang lemtet nung aliba ama inyaktsü.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngeri angateta agitsü mepishir**

Nigeria nung Khristmas mapang lendong atema Khristantem renemshir



Nigeria nung tamangertem tekülem sentong nung adendang tangokba noksa nung angur.

December 14, 2024: Tesüiba küm 10 tsüngda alima nung Khrista dak amangba atema nisung teimtiba tepsetba linükji Nigeria lir; 2009 küm nungi 2023 küm tashi nung Nigeria nung Khristan 50,000 dak tali tepsetogo aser million aika jensiogo.

Yaküm Khristmas mapang nunga Nigeria nung Khristantem aika tepseta liasü, ibayongji Nigeria nungbo Khristantem. Khristmas mapang lendong ajurutsü ta meteta renemshir, ta International Christian (ICC)-i metedaktsü.

Taküm-a Khristmas benjung atongtsü mapang ana nung lia Khristantem aikati Yisu Khrista asoba benjung amongtsü atema bilemba den küleme parnoki lendong ajurutsü ta arendaker.

UK nung azünger Nigeria nunger Khristan, Samuel-i, "Nigeria nung rara aser Khristantem reshikangshiba nung ajemdaker takümbo Khristmas mapang nung Tenla ki aika nung police mesüra security sepaitem alitsü," ta ashi.

Samuel ya Kaduna state nungi lir. 2022 küm nunga Khristmas mapang nung Kaduna state nung Khristan

aika tepset aser 2012 küm Easter Sunday nunga Khristan aika tepseta liasü.

2022 aser 2023 kümtem nung Khristmas mapang Khristan aika tepsetogo, anungji taruba Khristmas nungbo Khristantem kanga kümdanga alitsüla, ta Samuel-i ashi.

"Amokmeren lira ketdangsertem nem metedaktsür saka karibо security agencies dak melung melemeter, anungji pei sasa kümzüktsü atema inyaktsü nüngdak," ta pai ashi.

Nigeria nung nütsüng tesadangbo Khristantem lir, ajisüaka Muslim nütsüng teimba aliba Northern Nigeria nung Khristantem mapang shia amaker.

Yaküm-a Nigeria kübok Plateau State nung Khristmas atongtsü anogo ka dang lia yimtsüng 15 amakdang Khristan 96 tepseta liasü. December 24 nü local government areas (LGAs) ana kübok yimtsüng 15 nung Khristan 96 tepset aser ki 221 rongdokja liasü.

"Ni North Nigeria nung intet, anungji Khristantem aika atema tetsübu ya taküm shilem

ka kümdaktsür aliba ni meteta lir. Ano kodang tangari amaktsü, ta shisabulua dang alir," ta Samuel-isä metedaktsü.

"Security agents karbo oshimashi. Parnoki özüng alema inyakertem menokdanger mesüra özüng alema inyakertem-a pusemer. Iba dakji alia North tsütsülen aliba Khristantem aikati, yimsü mesüra yimten dak sendakba nükjidong ataloktsü atema yimtenren lenir kari yarisema amaker ta bilemer," ta pai metedaktsü.

2024 küm tembangar arur, ajisüaka U.S. Department of State indang Countries of Particular Concern (CPC) list nung Nigeria züngoka mali. State Department indang Special Watch List Countries nunga Nigeria densema mali.

2023 küm kija nung alima nung Khristan 5,000 dak tali tepseta liasü, aser iba nungjagi shilem 80 bo Nigeria nung tepsetba Khristantem liasü.

"Northern Nigeria nung Khristantem aijangshiba amai shinga nem-a majangshidaktsüner. Kari onok yaritsü teblemba lira tangsa inyaktsüla," ta Samuel-i ashi.

Evangelical aikati social media ya tamangertem atema majung ta bilemer

December 14, 2024: Evangelical Khristantem aikati social media amshiba ya tamang jenjang atema tangzük anguba dang nungibo teraksa ang tuluba ta bilemer, ajisüaka parnoki social media odang amshir, ta Infinity Concepts and Grey Matter Research survey ajanga metedaktsü.

'Helpful or Harmful? Evangelicals & Social Media' report ya taküm küm tetenzüken Evangelical Protestant 1,039 dang asüngdangyaba nung ajemdaker renem.

Evangelical Khristan shilem 81-i parnok atema Facebook ya tongti social media platform lir ta ashi, iba sülen tanabuba, tasembuba aser pezübuba jenjang nung YouTube, Instagram, TikTok aser Pinterest lir.

Evangelical Khristan shilem 54-i, social media ajanga tajangzük anguba dang nungibo teraksa ang tuluba angur, ajisüaka parnoki social media

odang amshir, ta ashi.

Evangelical Khristantem jagi, social media ya ajanga tajangzük anguba dang nungibo teraksa ang tuluba, kechiyong social media sabang balala nung lendong aketba aser alima shi jangraba aika lir, ta ashi.

Khristan shilem 29-i, social media ya Khristantem atema dang masü saka ajak atema majung, ta ashi aser shilem 15-i social media ajanga yimsü balala amangertem ajak mejungi kongshir, ta ashi. Karibо, social media nung Khristan yimsü indang tangatetba tai agütsür aser Khristantem amokmerener, ta ashi.

Social media ajanga tajangzük tuluba angur, ta telangzüba agütsür Evangelical Khristantem, Khrista osangtajung proktsü, tamangertem longjemtsü aser tamangertem ajungmesotsü atema tashi tulu aketba hadir ka kümdaktsütetsü. Kanga shisadanga aser sarasadema social media amshiba ajanga Khristantem tayongzübatem koktettsü aser digital putu ka nung Tsüngrem yimli yangertsü atema maongka ama amshitetsü," ta metedaktsü.

Khristan shilem 18-ibo, social media ajanga Khristan ocettem aser videos melamela angur, aser tamangertem tsüngda

sendaktepteter, ta ashi.

Infinity Concepts and Grey Matter Research-i, "Metzü ajanga chiyungtsü nangdaktsür aser chiyungtsü wazuka yuteter aser taküm atema nüngdak. Ajisüaka metzü tali ajangabo tepletsler. Opioids ajanga tashi/angoba süngemdaktsür saka iba mozü tali chira temang yirutsür aser taküm aika samadaktsür. Taküm atema tzü nüngdak saka tzü tali ajanga lendong agütsür. Yamaji social media-a kasa dang lir," ta metedaktsü.

Parnokisa, "Arogo lenirtem lenisüba kübok social media ya Khrista osangtajung proktsü, tamangertem longjemtsü aser tamangertem ajungmesotsü atema tashi tulu aketba hadir ka kümdaktsütetsü. Kanga shisadanga aser sarasadema social media amshiba ajanga Khristantem tayongzübatem koktettsü aser digital putu ka nung Tsüngrem yimli yangertsü atema maongka ama amshitetsü," ta metedaktsü.

Alima tesem balala nung sorkartemi pei sensotem nem tamangba yimsü melentsü atema temeden magütsü tenokdangba balala benoker.

ANOGO ABEN TSÜNGREM DEN

TSÜNGREMER SAYATENYA MAPA

Elija ola KIBUBAI angashi, aser tanur tanelaiji tanaben pa dangi meyipa arua pa shia aru. ~1 Chubatem 17:22

Tsüngrem tenzüker ainkar Elija-i sarasadembal Tsüngremi angashi, aser pa sarasadem langzü. Tsüngremer tetuyuba ajanga pa arem nung aliba yim bushia aru. Tsüngremi renemtsüba aser tuyuba ama Elijai amitsür den jembi aser pa chiyongtsü asüngdanga angu aser pai amitsürla tanen makai chiyongtsü moatsü aser Elija lar kidang anena liasü. Iba mapang amitsürlar tanur shiranga asüba tamang agi ainkari Tsüngrem nem taküm aser tanelia jenjang agüja mepishi aser tanur taküm shia aru. Tsüngremi tesüngmangtsü sayatenya mapa inyaktsü.

Tsüngremi ajak inyaktetsü akoker. Asenoki kodaka paji amangteter, patetkaji asenok temoatsü aser tekümzük lir. Tsüngrem tsüngdang mapa tasak temela ta kecha maka. Saka Tsüngremi pa pei teinyaktsü shilem inyaka asen nükdang pa tesüngmantsü sayatenya mapa jungkai adoktsü asoshi aseni koba tetka Tsüngrem dak tamang kateta temulung lemteta lir? Aji kanga tongtipang.

Adianu, teyanglur Tsüngrem dangi asen teka asen tnela asen tashi aser mulungsentsü ajak ajungketdi aser pa tesüngmangtsü ain tashi ta asen tamang yudi. Idangji pai asen asoshi sayatenya tulu inyaktsü.

Alima nung anti-conversion ozüng benoka aliba linük 46 lir

December 14, 2024: United States Commission on International Religious Freedom (USCIRF) aser International Christian Concern (ICC)-i report ka ajanga, tang alima nung anti-conversion ozüngtem benoka aliba linük 46 lir, aser ibajii alima nung aliba linüktem shilem 25 jungnüsü lir, ta metedaktsü.

Anti conversion ozüngtem benoka aliba linüktem rongnung Algeria, Bhutan, Myanmar aser Nepal linüktem densema lir.

Middle East aser North Africa kübok linük 16 nung anti conversion ozüngtem benoka lir, East Asia aser Pacific kübok linük 10, South & Central Asia kübok linük 9, Europe aser Eurasia kübok linük 7 aser Sub-Saharan Africa kübok linük 4 nung anti conversion ozüng benoka lir.

Alima tesem balala nung sorkartemi pei sensotem nem tamangba yimsü melentsü atema temeden magütsü tenokdangba balala benoker.

Research agirtemi anti-conversion ozüngtem shilem 54-i, social media ajanga tajangzük anguba dang nungibo teraksa ang tuluba angur, ajisüaka parnoki social media

pezü küma lemsa, aser itemji: pei yimsü toktsüba nokdangba ozüng, yimsü balala amanger ana tsüngda kiyimba nokdangba, tangar kar tanga yimsü dangi meyipdaktsüba nokdangba aser maitsü dak sendakba tenokdangbatem lir.

Item shilem pezü nungjagi tamajungibaji pei yimsü toktsüba tanga yimsü agizükba tenokdangba lir, ta ICC-i metedaktsü.

Pei yimsü toktsüba tenokdangba aliba linüktenet lir, aser item linüktem rongnung Brunei aser Yemen na densema lir. Item linük nungbo Khristan yimsü agizükra tasüba temerenshi obendang-a agütsütsü.

Ano ozüng kaji pei yimsü tangar kar den lemsateba tenokdangba lir aser iba ozüng kübok talisa Khristan missionary tem mapa nokdangba. Iba ozüng ya linük 33 nung lir.


Ano yimsü balala amangertem tsüngda kiyimba nokdangba linük aika lir aser item linüktem rongnung Algeria aser Malaysia densema lir.

AO OSHI ANGAZÜKDAK:**TANÜ ANGAZÜKTSÜBA OJANG****Tatentep**

(n) tetsüngda nung sendaktepba(intervening / joints)
 * Küm tejenba aser tasenba na tatentep nung asenok sarasadem mapang agütsü.

Tateptsü

(n) Süngsü, yintem, azüktsü atema yangluba süng (a tool to hit or break)
 * Süng agi tateptsü yanglua tsük ajak tepzüker kidangi bener adok.

OLONG PAITEP # 7011**TIPLÉN**

2. Teburtemi tejak nung awaba
 6. T ___ em
 8. Tzük ayudak
 9. Nüngdakba dang timba
 11. Züina ao
 12. Yangi tzü angur
 14. Tangar dang nungi tali
 16. Senyong masü
 17. Oadokdi
 18. Tzü tarok
 19. Yimtaklir aikati iba ya ki den
 külemi yanglusemer

LANGTSÜNGLEN

- (8) 1. Temejangdak
 - (3) 2. Nisung ka mapa inyaktsü nübo
 - (3) 3. Azüntsü asoshi mejemba
 - (6) 4. Tesangwa agütsüba
 - (4) 5. Tila masü
 - (5) 6. Tebenjem tetsür chanu
 - (4) 7. Tekolak nung inok
 - (6) 8. Tetsüngda
 - (3) 9. Tangar inyakba ka inyak
 - (4) 10. Tim masü ta ashi
 - (6) 11. Asalendong
 - (8) 12. Tanüdangtsü

OLONG PAITEP # 7010 TELANGZÜBA**TIPLÉN :**

5. Ajak, 6. Wabong, 8. Taju,
 10. Oro, 11. Talila, 13. Likok,
 15. Laktet, 17. Yok, 19. Magi,
 21. Teyari, 22. Aiwa.

LANGTSÜNGLEN :

1. Tamet, 2. San, 3. Maru, 4. Soro,
 7. Tali, 8. Tila, 9. Jakla, 12. Akki,
 14. Oagi, 16. Tapak, 18. Keyi,
 19. Meru, 20. Kin.

NAI-A YA METETTER MA

Yamuna Christian College campus nung 5,500 square feet tasazük nung yangluba rangoli London Book of World Records nung züluokogo. December 12, 2024 nikongdang Deputy CM Keshav Prasad Maury alia city Mayor Ganesh Kesarwani-i "world's largest rangoli" indang kulikaket agizüka liasü.

Iba artwork ya Indore nungi Shikha Sharma lenisüba kübok yanglu aser ghonda 72 nung natural colours 11 tonnes shi amshia liasü.

Mizoram Governor-i 35 Assam Rifles nem sempettem lema agütsü**Aizawl, December 14, 2024**

(Agencies): Mizoram Governor Hari Babu Kambhampati-i sepai 35 nem Governor's Gold aser Silver medals sepaitem nem tenüngsang agütsü. Sempettem ya 2024 atema Gold medals 15 aser Silver medals 20 dena lir.

Investiture Ceremony nung sepaitem nem Governor's Gold aser Silver Medals agüja liasü.

Inspector General Assam Rifles (East) kübok Assam Rifles-i Circular Lawn, Raj Bhavan nung investiture

ceremony ayongzüka agi.

"23 Sector Assam Rifles-i drug khuret anema mapa tajung inyakba atema tenüngsang agütsür. AR sepaitemi tawa prangpong-injangtem aser telungpurtem puogo" ta pai ashi.

Assam Rifles ya India nung paramilitary forces tejentiba rongnung ka lir aser nübertem asoshi inyakba atema 'Friends of the Hill People' ta ajar ta Governor Kambhampati-i ashi.

Arunachal nung school water tank chirepdang kaketshir 3 asü

Guwahati, December 14, 2024 (Agencies): Arunachal Pradesh kübok Naharlagun

nung water tank ka chirepdang kaketshir asem asü aser ana yiru.

St. Alphonsa School nung kaketshir asem asü aser ana chirep.


Parnok ajak Tomo Riba Institute of Health and Medical

Sciences (TRIHMS)-i anir ao ajanga atalok" ta Deputy Superintendent of Police (DSP)

& Sub-Divisional Police Officer (SDPO) Rishi Longdo-i ashi.

School ki ajunga shibangtsüogo aser tensa azüoktsü atema police mapa lenzükja lir.

Iba tatalokba jungjunga bushisüngdangtsü aser aibeleneritem merenshitsü ta Rishi Longdo-i ashi.

Manipur nung Nagaland arrtsü anasa brown sugar apu**Imphal, December 14, 2024**

(Agencies): Manipur nung police telok kati mozü shibeleren pezü apu. Parnok ya Nagaland ajanga Assam-i brown sugar bener aoba apu.

Nagaland den arrtsüa aliba Senapati district nung par pezü apu.

Osang tejangja ka angazükba sülen Manipur Police telok kati Chhiphaodai yimtsüng nung ki ka mita ao.

Idangji sapong pongdang 150 nung brown sugar seret 5.87 yua aliba angu aser iba indang jenjangji international market

nung Rs 11 crores shi alang liasü.

Iba ya Chhiphaodai nunger N Sohrii'er (40) kidang apu. Iba dak sendakba nung Khovi (27), Raivikho (23), Lovi (24)

aser Veipoukho (23) nunger pua lir.

Külen, Churachandpur Police, 36 Assam Rifles, Churachandpur Forest Division, aser Narcotics and Affairs of Border (NAB) ketedangsürtem külemi Thinghangjang nung ali acre 5.7 nung poppy lu raksatsügo.

December 13 nü Ukhru

District Police, Forest Department, 18 Assam Rifles, aser district administration-i Khamasom hill ranges nung ali acre 110 nung poppy alu raksatsü.

Parnokisa Ukhru PS telongtet nung alu nug jen 8 rongdoktsü aser iba dak sendakba nung FIR ka benokogo.

Chief Minister N. Biren Singh-ia ketedangsür ajak dang drug trafficking aser illegal poppy cultivation anema mapa tajung inyakba atema tenüngsang agütsü.

MULUNGREN O

"Ni alizüng tonga asemogo, ni tamangji yuogo."
2 Timoti 4:7



Late. Mrs. Ongkiyala

04 AUGUST, 1927 – 06 DECEMBER, 2024

Onoki teti meima aliba ojala **Asür Mrs. Ongkiyala (Longkhum)**, asuba mapang onok den yariteper ajunga dang ozü temulung taroktiba nungi pelaba lemsateper. Tembar, Kinunger, Kiyonger, Arogo, Lokti balala aser temulunger temi yimya balala nung ozü dang temeim sayuba aser mapa tajung inyakba atema kanga pelar. Nenok kija shia dang ozü pelaba meshitetrnung sasar, saka asen Tulusang Tsüngremi nenok ajak moatsütsü ozü sarasadem.

Teti onok mulungjang nung lir,

Temeim Chirnur aser Semchirtem.

South Korea tir Yoon Suk-yeol mapa nungi anentsütsü lemtet

Seoul, Luchii/December 14 (Agencies): Martial law mapang tatsüka atema benokba dak sendakba nung National Assembly-i South Korea tir Yoon Suk-yeol mapa nungi anentsütsü atema vote agütsüogo.

Unicameral National Assembly nung Honibarnü züngsem 204-i pa mapa nungi anentsütsü pusema vote agütsü aser züngsem 85-i pa pusema vote agüja liasü. Züngsem asemi vote magütsü aser vote ti invalid liasü.

Vote ya secret ballot ajanga agi aser tir mapa nungi anentsütsü atema vote two-thirds nüngdaka liasü. Assembly nung züngsem 300 pronglai vote agüja liasü.

Tir Yoon Suk-yeol mapa nungi anentsütsü pusema vote agütsüba sülen kima longkak aitertem meyirejang aika adenshia alirtem ola tulu adoka pelatepa liasü.

Vote agitepba sülen Yoon-i, tatem tashi par linük asoshi takokba tashi tajungtiba inyaktsü tenangzükba agüja liasü.

"Ni tang anenaka taoba küm anaser tesadang inyaka arurtem den tarutsü nunga maneni inyakyonga aotsü," ta Yoon-i ashi.

"Ni taitsüba, tajungshiba aser ni pusemba abentsü aser tatem tashi linük asoshi takokba tashi inyaktsü," ta paisa ashi.

Tir mapa nungi anentsüba sülen Yoon-i tangsa tang office toktsütsü aser South Korea indang Constitutional Court-i pa tia asadangtsü.

Ato Kilonser Han Duck-soo-i interim tir ama inyaka atatsü.

Han-i sangdong ka ajanga, "ni sorkra inyakyim nung kecha



Yoon Suk-yeol

tetsükdaktsü madokdaktsütsü atema kü tashi ajunga bendanga agüja inyaktsü," ta ashi.

Kasa mapang nung Constitutional Court-i anogo 180 tsüngda Yoon tarutsü atema telemtetba agitsü. Pa mapa nungi anentsütsü atema telemtetba agira Yoon ya South Korea indang puti otsü nung tir mapa nungi takok ngua anentsüba tanabuba tir asütsü.

Conservative tirsa Park Geun-hye 2016 küm December ita impeach sütsü aser 2027 küm March ita office nungi aginjia liasü.

Yoon'er conservative People Power Party (PPP)-i iba hopta tetenzüklen pa mapa nungi anentsütsü atema vote agitepba nung shilem magi.

Iba sülen PPP lenir Han Dong-hoon-i party dang vote agütsüba nung shilem agitsü mepeshia liasü. Party-i Yoon mapa nungi agitsü atema benokba ya magizüki arudar.

Vote magitep tsüngda PPP züngsem tenetibo parnoki Yoon mapa nungi anentsütsü atema vote agütsütsü ta shiogo aser iba tetezi tir mapa nungi anentsütsü

atema vote 200 nüngdaka aliba nungi ka dang nüngdaka küma liasü.

Vote magitep tsüngda linük yimtiba Seoul nung nisung 200,000 shi-i yimtong nung longkak aita liasü.

Al Jazeera osangbener Eunice Kim-i Seoul nungi ashiba agi, South Korea nungertem taoba hopta ana ken o mejangjai aruogo aser tarutsü tia tensa-a mejangjai lir," ta ashi.

National Assembly senden tenzükba mapang Speaker Woo Won-shik-i, puti otsü melenshitsü atema assembly züngsemtem kabuma nung lir ta sangdonga liasü.

National Assembly nung opposition party tongtiba Democratic Party of Korea lenir Park Chan-dae-i, sorkar anemertem rongnung Yoon ya lenir lir, ta ashi.

Paisa, tir mapa nungi anentsütsü atema vote agitepba ajanga dang South Korea indang temzüng ozüng kümzüka yetettsü, ta ashi.

Yoon-i martial law sangdongba ajanga linük nung mepetmesü tulu adokogo, agisüaka Yoon-i tang tashi pai kecha tai inyaka mali ta shia arudar. Kasa mapang nung Yoon aser pa nem teyari agütsürtem bushisüngdang südar.

Pa indang approval rating 11 percent dang akümba Hokolbarnü sayaba Gallup Korea poll ka ajanga sayuogo.

Martial law sangdongtsü lia November ita survey ka agiba mapang pa indang approval rating 19 percent dang liasü.

Kasa pool ajanga nütsüngyongsük shilem 75-ibo pa mapa nungi agitsü pusemba ngutetogo.

Pak nung medical city ka atema China-i USD billion 1 intoktsü

Islamabad, Luchii/December 14 (Agencies):

China nunger shishilembar telok katir Asif Ali Zardari den ajurutepogo aser Pakistan nung medical city ka amenoktsü atema parnok tejangraba aliba lemsatepogo, ta media sangdong ka ajanga metedaktsü.

Pakistan aser China na tesendaktep tajung lir aser China-Pakistan Economic Corridor project amala terenlok maparen densema China-i Pakistan nung senotsü aika intoka arudar.

China nunger investor tem aser Zardari na Brehostibarnü senden amenba mapang Karachi indang Dhabeji Economic Zone nung USD billion 1 intoka medical city ka amenoktsü atema parnok tebilemba aliba lemsatepogo. Karachi ya Pakistan nung yimti tulutiba aser financial hub lir.

Iba medical city ya Pakistan indang mezüngbuba integrated pharmaceutical aser medical ecosystem asütsü.

Korangi Association of Trade and Industry (KATI) shirnoki Dhabeji Economic Zone achaayanger, parnoki ashiba agi, China nunger investor temi tenangzükba agütsüba ajanga linük ana tsüngda rongsenketzung nung tesendaktep tajungba küma aoba sayur.

Sindh sorkar aser China nunger investor tem kaga takok ngua sensaksema sülen iba senden amenba mapang Sindh Chief Minister, Syed Murad Ali



Asif Ali Zardari

Shah aser Chinese Consul General natia shilem agia liasü.

Tir Zardari-i, China aser Pakistan na tsüngda rongsenketzung aser shishilemba nung tesendaktep akangshitsü koda tongtibang iba indang lemsatepa liasü, ta kasa sangdong ajanga metedaktsü.

Maneni China nunger shishilembar tem yagi health sector nung dang masü saka aluyimba, shiruru metsüba, energy, transport, aser manufacturing amala tongtibang lenlatem nunga senotsü intoktsü tejangraba aliba lemsatepogo.

Tir-i, Pakistan nung sen intoktsü atema China nungertem nem takokba tashi teyari agütsütsü sorkar bendaña agütsür aliba metedaktsüogo.

Sindh Chief Minister-ia, investor tem dang province nung oshi ajanga tetsükdaktsü adokba agintsü aser linük ana tsüngda sobaliba tesendaktep tajungba kümdaktsütsü atema China oshi sayu tenzükogo, ta metedaktsü.

Israel-i Gaza nung mozuki aser school maneni amaker

Gaza City, Luchii/December 14 (Agencies):

Nuseirat camp maka nisung aika tepsetba sülen anogo ka lir Israel nunger sepaitemi maneni school, mozuki aser Gaza Strip nung kitem maka nisung aika tepsetba den aika yirutsüogo.

Honibar anepdang züngia lia Jabalia amakba mapang Saadallah kibong nungi nisung pezu tepsetogo.

Israel nunger sepaitemisa Gaza City north len school ka nung nisung ana tepset aser Khan Younis nung süki ka nung jenoker aliba nisung ka tepseta liasü, ta Palestinian news agency Wafa-i metedaktsü.

Honibarnüsa military-i Gaza City nungi northwest len Jalaa Junction nung civilian tem telok ka amakba mapang tetsür ka tepset aser aika yiruja liasü.

Israel nunger sepaitemi Nuseirat refugee camp maka nisung 36 tepsetba sülen anogo ka dang lir Honibarnüa tesem balala makogo. Hokolbarnü Nuseirat refugee camp amakba ya aikati aitsüogo.

Northern Gaza, koba taoba ita ana tashi sabanger lir, iba

tesem nung Israel nunger sepaitemi Beit Lahiya aser iba tesem temeket nung kitem poksatsüba den aika rongtoktsüogo aser Kamal Adwan Hospital-a maka liasü, ta Wafa-isa metedaktsü.

Deir el-Balah nungi Al Jazeera osangbener Tareq Abu Azzoum-i, yashi Beit Lahiya anasa Kamal Adwan Hospital amakba mapang medical staff tem yiruogo aser ambulance tem rongtoka liasü, ta ashi.

Pai ashiba agi, Israeli military-i ambulance tem inyaksanghi mesüdaktsüner.

"Kasa mapang nung parnoki medical team tem tali nongshiner, shirnok maneni Kamal Adwan Hospital nung sabanger lir," ta pai ashi.

Iba mozuki indang intensive care unit director, taoba ita drone amshia amakba mapang tepsetogo.

Abu Azzoum-isa, Israel nunger sepaitemi Strip north len Jabalia, Beit Lahiya aser Beit Hanoon tesem maneni makdar aser tang tashi nung anogo 17 shi iba tesem tanen makai meita odar, ta ashi.

Kane maneni England Captain asütsü: Tuchel



Harry Kane (abelen) aser England manager Thomas Tuchel (Achiji) noksa nung angur

Luchii/December 14, 2024

(Agencies): England manager Thomas Tuchel-i, Harry Kane maneni linük captain asütsü ta ashiba sülen pa lenisüba kubok lenir melenshitsü akok ta bilema aliba jangashitsüogo.

Bayern Munich striker, shibai tawa England team-i takok tajung nguyonga aoba nung teyari agütsüdar pa dak Tuchel-ia tamang kateta lir.

Germany nunger coach shibai October ita Gareth Southgate melena liasü, pai Hokolbarnü 2026 FIFA World Cup qualifying draw asüba mapang osangbenertem den sensaksemdang iba olen

lemsatepa liasü.

2026 FIFA World Cup qualifying nung England team Group K nung Serbia, Albania, Latvia, aser Andorra den ata lir aser parnok March ita nungi asaya tenzüksü.

Tang temelensi atema bilemtsüba mapang masü, ta Tuchel-i osabenertem dang ashi. "Harry ya England atema captain tajung lir anungji tang kechiba temelensi atema bilemtsü.

Ajisüaka Tuchel-i, pai mapa kanga junga agizükba sülen asayartem ajak nem parnok shilem jangja jangja metedaktsütsü, ta shiogo. Paise,

Southgate mapang ama masü kecha tetsüdkaktsü makai telemtetba agütsü koda tongtibang iba indang lemsatepogo.

Asayartem rongnung Tuchel-i Arsenal defender Ben White anisemtsü tejangraba lir, shiba England team nungi tatemsä 2022 FIFA World Cup nung asayaogo, ajisüaka jurila maparen kar aliba ajanga pai squad tokja liasü. White ya Southgate indang staff den mangatetep aliba ajanga national team nung tarutsü mejangjata olulu osang prokshia liasü, koba mapang tatsüka lir tai ta sangdongogo.

Arishi küm 32 tain Amir aser arishi küm 35 tain Imad natu taküm United States aser West Indies nung T20 World Cup asayatsü atema asaya nungi anener aliba meyipa aru, saka iba asayamung nung Pakistan team group-stage nung tsükatok.

Arishi küm 26 tain asayar ya team nung anioptsü atema Tuchel tejangraba lir. "Ni pa den tongteprateptsü. January ita nungi ni asayatem reprangtsü aser Ben densema ajak den jembsü merangtsü," ta pai ashi.

2026 World Cup masaya tsüngdang qualifiers ya ita 15 dang asayatsü lir aser taruba küm March ita nungibö asaya tenzüksü asünung manager tasenba atema squad asadangtsü asoshi mapang tatakzük ka dang lir.

January ita nungi Premier League nung shilem agia asayartem asadangtsü Tuchel tebilemba lir.

Amir aser Imdna international asaya nungi anenogo



Amir & Imdna

Luchii/December 14, 2024

(Agencies): Pakistan nunger fast bowler Mohammad Amir aser all-rounder Imad Wasim natu tena international asaya nungi anenba sangdongogo. Tena tang agi tanabenbuba international asaya nungi anener.

Arishi küm 32 tain Amir aser arishi küm 35 tain Imad natu taküm United States aser West Indies nung T20 World Cup asayatsü atema asaya nungi anener aliba meyipa aru, saka iba asayamung nung Pakistan team group-stage nung tsükatok.

Amir ya 2019 küm Test asaya nungi anen aser iba sülen 2020 küm December ita international white-ball asaya nungi anena liasü. Team management-i pa mesenmetui amshir ta shia pai asaya nungi anentsü atema telemtetba agia liasü.

2010 küm Amir ya England den Test ka asayaba mapang spot-fixing atema captain Salman Butt aser Mohammad

Asif na den küm pongu atema asaya nungi tenokdangba agüja liasü.

Iba sülen asayar asemprongla ya UK nung tepuokdaki anir ao.

Honibarnü Amir-i X ajanga, pai international cricket asaya nungi anentsü atema telemtetba agiba sangdonga liasü.

Pai, "telemtetba agütsü temela masü saka mepaitoktetsü. Lanurtemi onok melenzüka Pakistan Cricket jenjang tasen kati ajungketsü tang ya mapang temetsü ama bilemer," ta ashi.

Amir-i Test asaya 36 nung wicket 119, one-day internationals asaya 61 nung wicket 81 aser T20 internationals 62 nung wicket 71 agiogo.

Kasa mapang nung Imad, Pakistan team nungi white-ball cricket dang asaya aser iba mapang pai ODI nung run 986 aser T20 nung run 554 yanglu liasü. Paise ODI nung wicket 44 aser T20I nung wicket 73 agia liasü.

D

Dimapur nung December 20 nü football trials agitsü

Dimapur, Luchii/December

14 (TYO): EnJogo den longjemer Bhaichung Bhutia Football Schools (BBFS)- Residential Academy Trials December 20 nü Greenwood School, Khelo India Center, Dimapur nung agitsü.

agütsütsü.

Iba inyakyim dak sendakba nung India nunger football asayar tejen Bhaichung Bhutia-i, "football ya linük nung sempet aketba lanurtem koba tesem nungi südir süaka ajak asayadaktsütsüba asaya ka ta onoki amanger. Iba trail ya Punjab nung lanur asayartem atema parnok nükjidong ataloktsü atema mezüngbuba jenjang agütsü asoshi maongka ka asütsü.

Iba trial ya U13 nungi U17 asayartem atema asütsü aser iba trail nung shimertem BBFS Residential Academy nung adentsü atema maongka agütsütsü.

BBFS aser EnJogo ajanga onoki asayartem nem parnok asaya renloka aotsü atema training aser sabang agütsür aser yamaji parnoki tarutsü nung India tenüng nungi temaba jenjang nung asayatettsü."

BBFS-i ayongzükb aser EnJogo-i teyari agütsüba iba inyakyim ya India nung mezüngbuba full-stack sports learning platform ka lir aser iba ya India nung football ecosystem tashitait ka yangertsü atema tongtibang jenjang ka asütsü.

Dimapur nung agitsü aliba trail ya iba tesem temeket nung aliba lanurtem atema parnok sempte tajung sayua iba program nung densemtsü asoshi maongka tajung ka lir aser iba nungi tenzüker asayartem tarutsü nung Indian National Team nungia asayatsü asoshi maongka angutsü akok.

BILEMDANGANG

"Ajemalurtemi alima senmang amangtsü."

4buba Winter Open Airgun Shooting Competition Wokha nung agiogo



Dimapur, Luchii/December 14 (TYO): Airgun Sporting Association of Nagaland (ASAN)-i ayongzükb 4buba Winter Open Airgun Shooting Competition December 14 nü Likya Community Hall, Wokha nung kaogo.

Asayamung lapokba sentong nung Wokha Town Council founding member Ajit John-i, Deputy Chairperson Nzano P Kikon alakteta jaoker liasü.

Sentong nung o jembiba mapang Nzano P Kikon-i, Wokha district nung iba asaya ajungketsü atema jenjang tapet agiba atema association nem tenüng sang agütsü. Laisa, asaya balala nung tetsürtemi shilem agütsü koda tongtibang iba indang jembiba den international sporting arena tem nung tetsürtemi teburtem dang nungi tajungba asayatetba lemsatepa liasü. Taküm iba asayamung nung tetsür asayar ka danga

maliasü aser iba dak sendakba nung lai tetsür asayartem dang shooting asaya nung shilem agütsü ajungshia liasü.

Maneni lai, lanur shooter tem nem sabang tajung ka agütsüba atema ASAN nem tenüng sang agüja liasü.

Sentong nungsa ASAN founding member Ajit John-i, Wokha adena orr Kohima aser Dimapur amala district temi nunga iba asaya benoka asayatsü atema association nükjidong aliba lemsatep.

Paise, Nagaland kubok tesem balala nungi shooter tem nem maongka kasa agütsütsü atema grassroots jenjang nung rangloker inyaktsü koda tongtibang iba indang lemsatepa liasü. Maneni John-i iba asayamung sponsor AZ Communication & Trading, M/S T.R. Lotha Electrical Division, IZZE Collection, aser R. Murry Gun House nunger

dang kanga pelaba lemsatep.

Iba tetoktepba ya L. Yibomo Odyuo-i akok aser tanabuba jenjang nung Benathung Ovung aser tasembuba nung M. Nyamo Odyuo liasü.

Asayamung lapokba sentong ya ASAN Secretary-General Zachamo Ovung lenisüba nung agi aser Wokha Town Baptist Church Deaconess Orenboni Kikon-i Tsüngrem temaotsü meshizuka sarasadema liasü.

Sentong nung ASAN tir Ajamo Odyuo-i lokti pela agizükba o jembi aser Sojano Tsopoe-i musical performance ka agütsü.

Asayamung atema züngoksemer parnok 40 nungi 34-i tetoktepba nung shilem agiogo. Asayamung ayongertemi ashiba agi, taoba küm dang nungi taküm asayar timbai shilem agiogo.